

1800
compte in 80

LES
LEÇONS
DES TENEBRES
DES
PARISIENS,
OU LES PROPHEITIES
de Jeremie sont nayuement
expliquées suiuant ce qui
arriue à present.



A PARIS,
Chez PIERRE SEVESTRE, au mont Saint
Hilaire dans la Cour d'Albret.

M. DC. XLIX.

THE

NEW

YORK

LIBRARY

OF THE

CITY OF NEW YORK

AND

LIBRARY


OF THE

CITY OF NEW YORK

AND

Auant-propos.

LE Prophete Ieremie preuoyant les malheurs qui deuoient tomber sur la ville de Ierusalem, aduertiy saintement de Dieu, versa des pleurs sur cette Cité, lesquels reduisant par escrit, il les appella Lamentations, à cause du sujet qu'elles contenoient. Dans cet ouurage diuin, estant inspiré de Dieu il prophetisa ce qui deuoit arriuer à ceite orgueilleuse Cité, de sorte qu'elle pouuoit euitier ses malheurs, si elle eut eu des yeux assez clairs pour descouurir les auertissemens que ce saint homme luy auoit donnez. Mais ce fut, à ce que ie pense, un secret jugement de Dieu, qui vouloit tirer raison de ce peuple, parce qu'il auoit fait mourir IESVS-CHRIST son Fils. Mais que dis je, nous sommes auengles nous mesmes, & ne voyons pas que ce que nous prenons pour les autres, peut estre aussi pris pour nous. Et comme les Propheties ne sont jamais claires à ce point, qu'on les puisse expliquer aisement, il est probable, que ces escrits peuuent estre appliquez à nostre fortune, si nous les voulons considerer de bien pres. C'est ce que ie desire de vous faire voir à present, vous monstrant veritablement, que Dieu en aduertissant les Iuifs de ce qui leur deuoit arriuer, vouloit aussi nous aduertir avec eux de ce que nous auions à craindre. Car comme vne predication n'est pas faite pour vne seule personne, mais bien pour un millier d'ames qui peuuent s'y rencontrer, il n'est pas si mal à propos que ces Propheties ne nous puissent seruir aussi bien qu'aux Iuifs. Ce que tu pourras voir aisément, cher Lecteur, si tu veux lire l'explication que i'y donne, que i'ay suiui le plus naïuement que i'ay pu. I'ay diuisé cét ouurage en trois iournées suiuanes, pour ne me point esloigner de l'intention de l'Eglise, qui chante ses Leçons en trois iours diuers que l'on appelle Tenebres, à cause qu'en tout ce temps-là IESVS-CHRIST fut dans les accessioires de sa Passion; ce qui te fera voir sans doute, que les predctions du Prophete ont tout predit ce qui s'accomplit maintenant; car ie ne me retire aucunement du sens de ce grand Prophete. De plus ie t'aduertiray que ie mets premierement son texte, que ie traduis fidellement en François, puis apres i'en donne l'explication à chaque pause, pour euitier la confusion. Ioüis heureusement du travail que ie te presente. Adieu.




LES LEÇONS DES TENEBRES DES PARISIENS.

OV LES PROPHEITIES DE IEREMIE
sont naïuement expliquées suiuant ce qui
arriue à present.

PREMIERE IOVRNEE.

PREMIERE LEÇON.

I.  *Ourquoy cette Cité si grande & si remplie de peuple est-elle maintenant toute seule, elle qui estoit la maistresse de toutes les nations de la terre, est presque reduite en l'estat d'une simple veufue. La Princesse de tant de grandes Prouinces, est maintenant obligée à payer tribut elle-mesme.*

Paris est cette deplorable Cité, qui a esté delaissée à l'im-pourueu de son Prince qu'on luy a malheureusement enleué, ce qui l'a reduite aux mesmes abbois d'une ieune femme, qui se voyant abandonnée de son cher espoux, ne fait plus que verser des larmes, & se retirant toute seule fuit la compagnie des autres.

2. *Versant des larmes elle ne cesse de pleurer le long de la nuit, & ses pleurs luy tombent continuellement sur les joües. Elle ne trouue personne pour la consoler, mesme parmy ses plus chers amis. Tous ses amis la mesprisent, & deuiennent ses plus puissans ennemis.*

Ne fut-ce pas la nuit que Paris commença de ressentir ses afflictions?

afflictions? N'est-il pas delaisfé de ceux qui le deuroient plus raisonnablement supporter? Ses Princes font ses plus grands ennemis, & ceux qui luy font la guerre.

3. *Iudas a changé de lieu à cause de l'affliction, & de la multitude de ceux qui estoient reduits au seruage. Il s'en est allé autro part, où il n'a peu trouuer de repos. Ce qui a fait que tous ceux qui auoient commencé de persecuter cette pauvre ville, se sont jettez tous sur elle, & l'ont reduite aux abois.*

Mazarin c'est ce miserable Iudas, qui ne pouuant plus demeurer avec nous, s'est eschapé de nos mains pour aller ailleurs, ne pouuant plus nous affliger dauantage, ny nous reduire en vn plus grand esclauage. Il est tourmenté de sa propre conscience, qui ne scauroit jamais le quitter. Et les Princes en fuite le soutenant contre la raison, ont commencé de nous boucher les passages, & de nous arrester les viures, ce qui nous a jettez en de grandes peines.

4. *Les chemins de Sion se plaignent, à cause qu'il n'y a personne qui vienne à la solemnité que l'on auoit coustume de faire: Toutes ses portes ont esté destruites, ses Prestres ont longuement soupiré, ses filles sont deuenues toutes haues & toutes crasseuses, & elle mesme s'est trouuée oppresse de l'affliction.*

Les chemins qui viennent de tous les endroits à la ville, ont formé des plaintes contre la violence de ceux qui les empeschoient. Et la solemnité que dit le Prophete n'est-elle pas trop visible, puis que le jour des Roys on nous empescha de nous réjouir, & nostre Careme. prenant ne s'est pas fait en meilleur estat. On a rompu les Pont-leuis de nos portes, nos Prestres & nos Religieux ont incessamment soupiré, adressant continuellement leurs prieres au Ciel; nos filles deuiennent tristes & changées, voyant qu'elles n'oseroient esperer durant tous ces troubles, d'estre mariées. Et toutes ces choses nous sont sans doute des occasions de tristesse.

5. *Ses ennemis se sont droitement posez à la teste, & se sont extrêmement enrichis, parce que le Seigneur a parlé sur elle, à cause de la multitude des pechez qu'elle auoit commis. Ses petits enfans ont esté conduits en captiuité, deuant les yeux de celui qui luy causoit tant de trouble.*

Le Prince marche luy mesme à la teste de ses soldats, ausquels il a donné le pillage. Et tout cela bien aßeurement n'est arriué que pour nos pechez: les soldats de nostre party, qui estoient petits à la verité, parce qu'ils se sont trouuez les plus foibles, ont esté conduits, à l'aspect du Prince, dans le bois de Vincennes, & ailleurs.

SECONDE LEÇON.

1. *Et toute la beauté de la fille de Sion l'a abandonnée: Ses Princes comme des Belliers n'ont point trouuë de pasture, & se sont esquivés sans force, de deuant les yeux des ennemis qui les poursuivoient.*

Paris est deuenu tout autre qu'il n'estoit auparauant ces remuëmens, & a si bien changé de visage, qu'on ne le sçauroit plus reconnoistre. Il a receu de l'eschec à Charenton & ailleurs par la surprise de ses ennemis.

2. *Ierusalem s'est ressouuenue des iours qu'elle eut de l'affliction, & de l'absence de tout ce qu'elle auoit desiré, & qu'elle auoit possédé de tout temps, lors que son peuple tomboit dans les mains de ses ennemis, & qu'il ne venoit personne pour la secourir. Ses ennemis l'ont enuiesagée, & se sont moquez de ses festes.*

Ce fut alors que ces pertes nous firent defiller les yeux pour mieux reconnoistre le mal qui nous talonnoit, & nous ressouuenir de la paix que nous possedions: nostre memoire, dis je, fut alors ouuerte, quand nous apperceusmes que nous estions tombez dans les mains du Prince, & que personne ne se hastoit de nous donner du secours. A cette heure-là nos ennemis n'oublierent point leurs brocards, & se mirent à se gauffer des prieres que nous faisions tous les iours dedans nos Eglises.

3. *Ierusalem a mis peché sur peché, c'est pourquoy elle n'est point demeurée dans vn mesme estat. Tous ceux qui luy portoient de l'honneur sont arriuez là-dessus, d'autant qu'ils ont apperceu son ignominie. Mais elle fondant toute en pleurs, s'est tournée de l'autre costé.*

N'est-il pas vray que Paris estoit si rempli de toutes sortes de crimes, que la paillardise & la volerie sur tous les autres pechez y auoient la vogue, & qu'elle ne sçauoit en quelle posture se mettre, changeant tous les iours de mode, soit aux habits ou aux façons de parler: ce qui la faisoit mespriser de toutes les autres Citez, non seulement de France, mais de tous les endroits de la terre. Mais lors qu'elle s'est veüe affligée, elle s'est enfin reconnuë, & se tournant de l'autre costé, c'est à dire changeant de vie & de mœurs, elle s'est enfin repentie.

4. *Elle a de l'ordure aux pieds, & ne s'est point ressouuenue de sa fin dernière. Elle a esté rudement demise, ne trouuant aucun moyen pour se consoler. Seigneur considerez mon affliction, parce que mon ennemy est desia tout droit.*

Nous auons auparauant les pieds sales, car nous courions à bride abbattüe à toutes sortes de crimes, ne nous ressouuenans pourquoy nous sommes au monde. Nous auons esté re-

jettez rudement de Dieu, qui nous abandonnant tout à fait, ne nous a plus laissé personne pour nous consoler.

TROISIÈME LEÇON.

1. *L'ennemy a porté sa main à tout ce qu'elle auoit de plus cher, parce qu'elle a veu les nations entrer dans son Sanctuaire, nations que vous auiez commandé de n'y pas entrer.*

Il n'y a rien de plus clair que cette prophétie, car l'ennemy qui a porté sa main sur ce que nous auions de plus cher, est Mazarin qui nous a enleué le Roy, dont l'absence nous est si sensible, qu'elle est à la vérité le plus grand mal que nous ressentons. C'est Mazarin, dis-je, qui a esté si perfide & si temeraire, que d'entrer dans le Sanctuaire de Dieu en se faisant Cardinal, titre qu'il porte, s'il faut dire ainsi, contre la volonté de Dieu mesme, qui ne l'a iamais approuué, tesmoin sa meschante vie.

2. *Tout son peuple gemit & cherche du pain. Ils ont donné tout ce qu'ils auoient de plus riche & de pretieux pour se refaire vn petit. Regardez moy, Seigneur, & considerez, parce que vous m'avez fait si abjecte.*

Dans Paris le peuple a longuement soupiré, & gemit encore à present pour auoir du pain. La famine l'a tellement oppressé qu'il ne se soucioit plus de thresors, ny des choses les plus precieuses, pourueu qu'il eust dequoy se rassasier, & pour soulager sa famine. Iettés-toy donc, pauvre peuple, en ces iours si considerables à cause de sa Passion qu'il souffrit pour l'amour de toy, jettés-toy entre les bras de ton Dieu, qui t'a si fort rauallé, sans autre dessein que pour te releuer puis apres.

3. *O vous tous qui passez par ce chemin cy, voyez & considerez s'il se peut rencontrer vne autre douleur qui soit semblable à la mienne, parce qu'il m'a vandangé, comme parle le Seigneur au jour qu'il entre en fureur.*

Je sçay que ces paroles dans tous les escrits des Sçauans, sont saintement exposées pour signifier la personne de nostre Seigneur Iesus-Christ; mais vous me permettrez neantmoins de les accommoder au sujet que j'ay commencé. Y a-t'il donc vne plus grande douleur que celle des Parisiens. Ils sont priuez de leur Roy, leurs plus chairs Princes sont leurs ennemis, vn seul particulier leur cause vn mal sans pareil; dans leur cœur ils voyent la nécessité du peuple, les Marchands se ruiner insensiblement, le Senat auoir mille peines à composer les affai-

res, la Noblesse estre diuisée, l'Eglise auoir beaucoup de trauaux, & bref ils voyent tout en si mauuais ordre qu'il est bien difficile d'y remedier, sans que la main de Dieu s'en vueille mesler.

4. *Il a fait choir du feu du plus haut du Ciel, dont il a consommé mes os, & par ce moyen il m'a rendüe plus sçauante. Il a tendu deuant mes pieds vn fil, & m'a fait tourner d'un autre costé. Il m'a rendüe toute desolée, & toute confite en tristesse.*

Le feu que Dieu a fait choir sur Paris ce sont les afflictions, car comme il n'espargne rien de tout ce qui est propre à brusler quand il s'y attache vne fois: de mesme les afflictions n'ont rien espargné dans Paris, depuis le plus petit jusques au plus grand, & à tous ensemble il a donné la science, c'est à dire la connoissance des fautes. De plus ces mesmes afflictions ont vn puissant filé pour arrester nos pechez, & qui nous retirant des mauuaises inclinations, nous a fait tourner du costé de Dieu par la penitence, qui faisant naistre des regrets au plus profond de nos ames, nous a fait pleurer nos pechez.

5. *Le joug de mes iniquitez à veillé; elles ont esté tournées dans ses mains, & mises dessus mon col. Ma force s'est trouuée affoiblie; le Seigneur m'a mise dans le pouuoir d'une main dont ie ne pourray me leuer.*

La pesanteur de nos crimes n'a cessé de nuit & de iour à nous tourmenter. Le iour nous auons esté sur les armes, & la nuit nous auons eu des alarmes qui nous faisoient craindre la surprise de nos ennemis. Tantost l'ennemy venoit à nos portes, l'on vouloit brusler les faux bourgs, on tuoit nos gens dessus les chemins. Enfin Dieu a tourné & retourné dedans ses mains nos pechez, & les rejettant dessus nostre col, il nous a punis rigoureusement, de sorte que nostre force n'a peu resister au mal. Et pour la derniere punition il nous a mis entre les mains d'un miserable estranger, dont nous aurons bien de la peine à sortir, s'il ne plaist à Dieu de nous secourir vistement.

Fin de la premiere Iournée.